

欽定四庫全書

集部

欽定補繪蕭雲從離騷全圖卷下

欽定四庫全書

欽定補繪蕭雲從離騷全圖卷下

九章傳

九章者屈原之所作也屈原於江南之野思君念國
憂思罔極故復作九章章者著明也言已所陳忠信
之道甚著明也卒不見納委命自沈楚人惜而哀之
世論其詞以相傳焉




惜誦以致愍兮發憤以抒情所非忠而言之兮指蒼天
以為正令五帝以折中兮戒六神以鄉服俾山川以備
御兮會咎繇以聽直竭忠誠以事君兮反離羣而贅眈
忘儼媚以背衆兮待明君其知之言與行其可迹兮情與
貌其不變故相臣莫若君兮所以證之不遠吾誼先君
而後身兮羌衆人之所仇也專惟君而無他兮又衆兆
之所讐也壹心而不豫兮羌不可保也疾親君而無他
兮有招禍之道也思君其莫我忠兮忽忘身之賤貧事

君而不貳兮迷不知寵之門忠何辜以遇罰兮亦非余之所志也行不羣以顛越兮又衆兆之所咥也紛逢尤以離謗兮謫不可釋也情沈抑而不達兮又蔽而莫之白也心鬱邑余侘傺兮又莫察余之中情固煩言不可結詒兮願陳志而無路退靜默而莫余知兮進號呼又莫吾聞申侘傺之煩惑兮中悶瞀之忪忪昔余夢登天兮魂中道而無杭吾使厲神占之兮曰有志極而無旁終危獨以離異兮曰君可思而不可恃故衆口其鑠金

兮初若是而逢殆懲于美而吹壑兮何不變此志也欲
釋階而登天兮猶有曩之態也衆駭遽以離心兮又何
以為此伴也同極而異路兮又何以為此援也申生之
孝子兮父信讒而不好行婞直而不豫兮鯀功用而不
就吾聞作忠以造怨兮忽謂之過言九折辟而成醫兮
吾今而知其然矰弋機而在上兮罽羅張而在下設張
辟以娛君兮願側身而無所欲遭回以干祭兮恐重患
而離尤欲高飛而遠集兮君罔謂女何之欲橫奔而失

路兮堅志而不忍背膺脾其交痛兮心苑結而紆軫擣
木蘭以播蕙兮繫申椒以為糧播江離與滋菊兮願春
日以為糗芳恐情質之不信兮故重著以自明矯茲媚
以私處兮願曾思而遠身

惜誦




余幼好此竒服兮年既老而不衰帶長鈇之陸離兮冠
切雲之崔嵬被明月兮佩寶璐世溷濁而莫予知兮吾
方高馳而不顧駕青虯兮驂白螭吾與重華遊兮瑤之
圃登昆侖兮食玉英與天地兮同壽與日月兮齊光哀
南夷之莫我知兮旦余濟于湘江乘鄂渚而反顧兮歎
秋冬之緒風步余馬兮山皋即余車兮方林乘舸船余
上沅兮齊吳榜以擊汰船容與而不進兮淹回水而疑
滯朝發枉渚兮夕宿辰陽苟余心其端直兮雖辟遠其

何傷入淑浦余遭回兮迷不知吾所如深林杳以冥冥
兮乃猿狖之所居山高高而蔽日兮下幽晦以多雨霰雪
紛其無垠兮雲霏霏而承宇哀吾生之無樂兮幽獨處
乎山中吾不能變心而從俗兮固將愁苦而終窮接輿
髡首兮桑扈羸行忠不必用兮賢不必以伍子逢殃兮
比干菹醢與前世而皆然兮吾又何怨乎今之人余將
董道而不豫兮固將重昏而終身亂曰鸞鳥鳳皇日以
遠兮燕雀烏鵲巢堂壇兮露申辛夷死林薄兮腥臊並

御芳不得薄兮陰陽易位時不當兮懷信侘傺忽乎吾
將行兮

涉江



皇天之不純命兮何百姓之震愆民離散而相失兮方仲
春而東遷去故鄉而就遠兮遵江夏以流亡出國門而
軫懷兮甲之朝吾以行發郢而去閭兮荒忽其焉極楫
齊揚以容與兮哀見君而不再得望長楸而太息兮涕
淫淫其若霰過夏首而西浮兮顧龍門而不見心蟬媛
而傷懷兮眇不知其所踰順風波以從流兮焉洋洋而為
客陵陽侯之汜濫兮忽翺翔而焉薄心絀結而不解兮
思蹇產而不釋將運舟而下浮兮上洞庭而下江去終

古之所居兮今逍遙而來東羌靈魂之欲歸兮何須臾
而忘反背夏浦而西思兮哀故都之日遠登大墳以遠
望兮聊以舒吾憂心哀州土之平樂兮悲江介之遺風
當陵陽之焉至兮淼南度之焉如曾不知夏之為邱兮
就兩東門之可蕪心不怡之長久兮憂與憂其相接惟
郢路之遼遠兮江與夏之不可涉忽若去不信兮至今
九年而不復燥鬱鬱而不開兮蹇侘傺而含感外承歡
之灼約兮謔荏弱而難持忠湛湛而願進兮妒披離而

鄣之堯舜之抗行兮杳杳而薄天衆讒人之嫉妬兮被
以不慈之偽名憎愠愉之修美兮好夫人之忼慨衆躓
蹠而日進兮美超遠而踰邁亂曰曼予目以流觀兮冀壹
反之何時鳥飛反故鄉兮狐死必首邱信非吾罪而棄
逐兮何日夜而忘之

哀郢

